

*ORDE de XX de XXX de 2022, da Consellería de Facenda e Administración Pública, pola que se regula o pago mediante transferencia bancaria e xiro postal de débedas cuxa xestión recadatoria ten encomendada a Axencia Tributaria de Galicia*

A Lei 58/2003, do 17 de decembro, xeneral tributaria, regula no seu artigo 60 que o pago en efectivo das débedas tributarias poderá realizarse polos medios e na forma que regulamentariamente se establezan engadindo que a normativa tributaria regulará os requisitos e condicións para que o pago poida efectuarse utilizando técnicas e medios electrónicos, informáticos ou telemáticos, e, na mesma liña, no seu artigo 96.2 dispón que, cando sexa compatible cos medios técnicos de que dispoña a Administración tributaria, os cidadáns poderán relacionarse con ela para exercer os seus dereitos e cumprir cos seus deberes a través de técnicas e medios electrónicos, informáticos ou telemáticos coas garantías e requisitos previstos en cada procedemento.

Así mesmo, a Lei 39/2015, do 1 de outubro, do procedemento administrativo común das administracións públicas, fai fincapé na necesidade de fomentar as novas tecnoloxías aplicadas aos procedementos xestores de tributos como un instrumento idóneo para conxugar os principios de eficacia da Administración tributaria e a limitación dos custos indirectos ao contribuínte.

Na Comunidade Autónoma de Galicia, o Decreto Lexislativo 1/1999, do 7 de outubro, polo que se aproba o texto refundido da Lei de Réxime Financeiro e Orzamentario de Galicia establece no seu artigo 91 que os medios de pago admisibles polas caixas da Tesourería poderán consistir en diñeiro de curso legal, cheques nominativos, xiros, transferencias ou calquera outro medio de pago legalmente establecido. A consellería competente en materia de facenda establecerá as condicións que terán que cumprir e o momento no que en cada caso producirase a liberación da débeda.



O Regulamento Xeral de Recadación aprobado por Real decreto 939/2005, do 29 de xullo, regula a xestión recadatoria dos recursos de natureza pública en desenvolvemento da Lei 58/2003, do 17 de decembro, Xeral Tributaria, da Lei 47/2003, do 26 de novembro, Xeral Orzamentaria, e das demais leis que establezan aqueles. No seu artigo 34, establece que o pago das débedas e sancións tributarias que deba facerse en efectivo poderase facer sempre en diñeiro de curso legal. Así mesmo poderase realizar o pago, entre outros medios, mediante transferencia bancaria cos requisitos e condicións que se establezan no citado regulamento. Continúa sinalando que será admisible o pago por este medio naqueles casos nos que así se estableza expresamente nunha norma tributaria no caso de débedas e sancións tributarias e no caso de débedas non tributarias, en defecto de norma propia requirirase regulación expresa.

No artigo 37 do Real Decreto 939/2005, do 29 de xullo, no que especificamente se regula o pago por transferencia, establécese que «se considerará efectuado o pago na data en que tivese entrada o importe correspondente na entidade que, no seu caso, preste o servizo de caixa, quedando liberado desde ese momento o obrigado ao pago fronte á Facenda Pública pola cantidade ingresada.» O citado precepto engade que «a Administración establecerá, no seu caso, as condicións para utilizar este medio de pago por vía telemática.»

Doutra banda o Decreto 11/2021, do 21 de xaneiro, polo que se establece a estrutura orgánica da Consellería de Facenda e Administración Pública, atribúe á mesma as competencias e funcións que en materia de facenda establécense no Estatuto de autonomía, exercéndose a través da Axencia Tributaria de Galicia (en diante Atriga) as funcións de xestión recadatoria dos ingresos de dereito público, de acordo co disposto no Decreto 202/2012, do 18 de outubro , polo que se crea a Axencia Tributaria de Galicia e apróbase o seu estatuto.



Así, a Administración tributaria autonómica tratou de ampliar os medios de pago establecidos impulsando as posibilidades que ofrecen as novas tecnoloxías para facilitar aos cidadáns o cumprimento das súas obrigacións. Neste sentido apróbase a Orde do 10 de decembro de 2019 pola que se establecen o procedemento e as condicións para a domiciliación de pago de determinadas débedas cuxa xestión ten atribuída a Atriga que establece a posibilidade de solicitar a domiciliación do pago de autoliquidacións presentadas telemáticamente e das débedas aprazadas ou fraccionadas e o Decreto 95/2020, do 25 de xuño, polo que se regula o pago de recursos xestionados pola Atriga a través de entidades de crédito colaboradoras mediante tarxeta de crédito ou débito a través de sistemas de terminal punto de venda.

Continuando nesta liña, en aras de ampliar as posibilidades de pago de que dispoñen os contribuíntes e para dar resposta a todos aqueles casos nos que quen pretende efectuar o pago non ten aberta unha conta nalgunha das entidades colaboradoras na xestión recadatoria con esta Administración, establécense o xiro postal e a transferencia bancaria como medios de pago co obxectivo de reducir custos para as partes interesadas, sendo o desexo da propia Consellería de Facenda e Administración Pública facilitar ao máximo á cidadanía o cumprimento das súas obrigacións tributarias.

A presente orde está composta de tres artigos estruturados nun artigo primeiro relativo ao obxecto da orde, un artigo segundo que regula o pago mediante transferencia bancaria e un terceiro artigo relativo ao pago mediante xiro postal. Conta ademais con dúas disposicións finais; a primeira sobre a habilitación para o desenvolvemento normativo e a segunda sobre a entrada en vigor da norma.

O seu contido adecúase aos principios de necesidade, eficacia, proporcionalidade, seguridade xurídica, transparencia e eficiencia que establece o artigo 129 da Lei



39/2015, do 1 de outubro, do procedemento administrativo común das Administracións públicas.

O texto da orde foi sometido ao trámite de información pública regulado no artigo 42.3 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia. Así mesmo, conta con todos os informes preceptivos, incluídos o informe tecnolóxico- funcional da Dirección Xeral de Avaliación e Reforma Administrativa e da Axencia para a Modernización Tecnolóxica de Galicia e o informe da Asesoría Xurídica.

Así, en virtude do exposto, de acordo coa competencia establecida no artigo 34.6 da Lei 1/1983, do 22 de febreiro, reguladora da Xunta e da súa Presidencia, e de acordo co Consello Consultivo de Galicia,

#### ACORDO:

##### *Artigo 1. Obxecto da orde e ámbito de aplicación.*

A presente orde ten como obxecto a regulación da transferencia bancaria e o xiro postal como medios de pago de débedas xestionadas pola Axencia Tributaria de Galicia (en diante Atriga) así como establecer o alcance e as condicións que se terán que cumprir e o momento no que, en cada caso, producirase a liberación da débeda.

##### *Artigo 2. Pago mediante transferencia bancaria a través das Entidades colaboradoras na xestión recadatoria encomendada á Axencia Tributaria de Galicia.*

1. O pago daquelas débedas tributarias e outros ingresos de dereito público que, conforme á normativa vixente poida ser efectuado a través da Oficina Virtual Tributaria da Atriga poderá ser realizado mediante transferencia bancaria á conta restrinxida de recadación designada ao tal efecto nalgunha das entidades de



crédito autorizadas para actuar como colaboradoras na xestión recadatoria nos termos e condicións que se establezan.

2. Devandito procedemento unicamente poderá utilizarse por aqueles obrigados ao pago que opten por realizar o ingreso de forma non presencial e non dispoñan de conta da súa titularidade en ningunha entidade colaboradora na recadación coa Atriga.

3. Para todos os efectos recadatorios, considerarase efectuado o pago na data en que tivese entrada o importe correspondente na conta restrinxida de recadación designada ao tal efecto nalgunha das entidades de crédito autorizadas para actuar como colaboradoras na xestión recadatoria quedando liberado desde ese momento o obrigado ao pago fronte á Facenda da Comunidade Autónoma de Galicia pola cantidade ingresada.

### *Artigo 3. Pago mediante xiro postal*

1. O pago daquelas débedas tributarias e outros ingresos de dereito público cuxa xestión recadatoria teña encomendada a Atriga poderá ser realizado mediante xiro postal para o seu ingreso na conta restrinxida de recadación designada para ese efecto nalgunha das entidades de crédito autorizadas para actuar como colaboradoras na xestión recadatoria nos termos e condicións que se establezan.

2. Para iso, o obrigado ao pago deberá dispoñer dalgún dos documentos de pago emitidos por esta Administración e autorizados para a súa cobranza a través deste medio de pago mediante resolución da Dirección da Atriga. O pago deberá realizarse pola totalidade do importe para ingresar recolleito no citado documento, sen que caiba a posibilidade de realizar ingresos parciais do mesmo.

3. O pago do tributo ou ingreso de dereito público considerarase efectuado na data en que o xiro postal sexa imposto con independencia da data en que os fondos



sexan ingresados na conta restrinxida de recadación designada para ese efecto nalgunha das entidades de crédito autorizadas para actuar como colaboradoras na xestión recadatoria.

4. A libranza ou o resgardo do xiro postal que se emita non constitúe un xustificante de pago da débeda tributaria ou de dereito público que ostente o obrigado ao pago fronte á Atriga. O xustificante de pago será emitido por esta a solicitude daquel nos termos que se establezan.

5. O pago por esta vía non eximirá da obrigaón de presentar ante a Administración a documentación esixida na forma prevista polas normas reguladoras dos diferentes procedementos.

Disposición adicional única. *Habilitación normativa*

Habilítase á persoa titular da dirección da Atriga para establecer, no ámbito da xestión recadatoria, os requisitos, especificacións e demais condicións necesarias para a utilización dos medios de pago aprobados nesta orde.

Disposición final única. *Entrada en vigor*

A presente orde entrará en vigor ao día seguinte ao da súa publicación no Diario Oficial de Galicia.

Santiago de Compostela, x de x de 2022

O conselleiro de Facenda e Administración Pública

